

# Նիգավան

**Մակերես՝ 22.89կմ<sup>2</sup>**

**Բնակչություն՝ 707**

Գյուղ Ապարանի տարածաշրջանում, Ապարան քաղաքից 7 կմ հյուսիս-արեւմուտք: Մարզկենտրոնից գտնվում է 39 կմ հեռավորության վրա: Նախկինում ունեցել է Դանագերմագ, Դանագիրմագ, Հովիտ, Տանագիրմագ անվանումները: Նիգավան է վերանվանվել 1967 թ-ին: Գյուղի ներկայիս անվանումը կապված է Այրայատ աշխարհի Նիգ գավառի հետ:

Գյուղի շրջակայքում կան կիկլոսայան ամրոցի մնացորդներ, գյուղատեղիներ: Կառուցված է ս.Սահակ եկեղեցին՝ 19-րդ դար:

Գյուղը տեղադրված է Արագածի փեշերին: Գտնվում է ծովի մակարդակից 2025 մ բարձրության վրա:

Կլիման բարեխառն լեռնային է: Ձմեռները տեւական են, ցուրտ, հաստատուն ձնածածկույթով:

Ամառները տաք են, համեմատաբար խոնավ: Հուլիսյան միջին ջերմաստիճանը տատանվում է 16-18-ի սահմաններում, հունվարյանը՝ -6,-8-ի սահմաններում: Մթնոլորտային տարեկան տեղումների քանակը 450-600 մմ: Բնական լանդշաֆտները սեւահողային տափաստաններ են: Ունի սառնորակ աղբյուրներ:

1831 թ-ին ունեցել է 149, 1897 թ-ին՝ 873, 1926 թ-ին՝ 1401, 1939 թ-ին՝ 1659, 1959 թ-ին՝ 731, 1979 թ-ին՝ 670 բնակիչ: Բնակչության մի մասի նախնիները այստեղ են գաղթել Արեւմտյան Հայաստանի Էրզրումի, Մուշի եւ Պարսկահայաստանի շրջաններից 1828-1829 թթ.: Գյուղի բնակչության թիվը կազմում է 700 մարդ : Սեռային կազմում տղամարդիկ կազմում են 49%, կանայք՝ 51%: Բնակչության մեջ մինչաշխատունակ տարիքի բնակիչները կազմում են 28%, աշխատունակները՝ 51%, հետաշխատունակները՝ 21%: Գյուղն ունի առկա 154 տնտեսություն: Ունի դպրոց, գրադարան, կապի հանգույց, բուժկետ:

Տնտեսության գլխավոր ճյուղը գյուղատնտեսությունն է: Գյուղատնտեսական հողահանդակները օգտագործվում են գլխավորապես որպես արոտավայրեր, վարելահողեր: Քաղաքացիների սեփականությունը կազմում է համայնքի տարածքի մոտ 27%: Պահուստային հողերից արոտավայրերը զբաղեցնում են 723 հա, մոտ 54 հա՝ վարելահողեր: Զբաղվում են դաշտավարությամբ, բանջարաբոստանային, հացահատիկային, կերային կուլտուրաների մշակությամբ: Զբաղվում են խոշոր եւ մանր եղջերավոր անասնաբուծությամբ, թռչնաբուծությամբ:

Արդյունաբերություն չունի:

Համայնքի հիմնախնդիրների մեջ կարելուրվում է խմելու եւ ոռոգման ջրի ջրագծերի, գյուղամիջյան ճանապարհների վերանորոգումը: